

**Sanaartugassanut aningaasaliissutissani 2017-mi 2018-milu Aasianni Kulturikkut illorsualiassamut katillugu 15 mio.kr.-nik nunatta karsia aningaasaleeqataa-sinnaanersoq misissoqqullugu Naalakkersuisut peqquneqarnissaanik inatsisartut aaliangiiffigisassaattut siunnersuut.**

(Inatsisartunut Peter Olsen, Inuit Ataqatigiit)

### **Akissuteqaat**

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

### **Siullermeerinnineq**

Aalajangiiffigisassatut siunnersuut pillugu Naalakkersuisut qujapput.

Kulturikkut illorsuaq pillugu eqqarsaat nammineq isumassarsialatsialaavoq politikikkut oqallisigisassaqqissoq, tassanili pissutsit arlallit Naalakkersuisut uparuassavaat.

Naalakkersuisut uparuassavaat ilaatigut kultureqarnermik innuttaasunillu qaammarsaanermut init allallu pisariaqartut inatsisip atuuttut naapertorlugit kommunit suliaarigaat.

Ilaatigut timersortarfinnik, ataatsimiittarfinnik katersortarfinnik sanaartornermut, iluarsaassinermut ilusilersuinerimullu kiisalu kulturimik innuttaasunillu qaammarsaanermut tapersiinnissamut Naalakkersuisut periarfissaqarput. Tamassumunnga aningaasanut inatsimmi aningaasaliissuteqartoqarnissaa pisariaqarpoq.

2016-imut aningaasanut inatsimmi ukiunilu missingersuorsiorfiusuni siunertamut aningaasaliisoqarnikuunngilaq. Immikkoortumut siunissami aningaasaliissutaasinnaasut aningaasanut inatsisip suliarineqarnerani politikikkut tulleriinnilersuinerimut atatillugu oqallisigineqartariaqarput.

Kisiannili Danmarkimi 'Lokale og Anlægsfonde'-imut ilaasortaanermut ukiumoortumik 1,3 mio.kr.-nik Namminersorlutik Oqartussat akiliisarput, tassani suliaassamut ilisimasaqartunit sanaartornermi siunnersorneqarnissamut, tapersorneqarnissamut tassangaaniillu taarsigassarsinissamut kommunit periarfissaqarlutik. Kommunit kisimik 'Lokale- og Anlægsfonden'-imut qinnuteqarsinnaapput, taannalu ilaatigut Upernavimmi Timersortarfimmut Kulturimullu Illumut, Narsami Nuummilu Inuusuttunut Kulturimut illunut Nuummilu naluttarfimmut Malik-mut aningaasaleeqataanikuuvoq.

Periarfissat ersarissumik nassuiaasersorneqareermata Naalakkersuisut taamatut oqaaseqarlutik siunnersuut tapersinnaangilaat. Tamassuma saniatigut Naalakkersuisut isumaat malillugu sanaartornissanut kissaatit tamarmik aningaasanut inatsisip isumaqatiginiarneqarneranut ilanngunneqartariaqarput.